

四庫全書

集部

欽定四庫全書

集部

宋元詩會卷五十五

十六

詳校官中書臣陸湘

主事銜臣徐以坤覆勘

總校官知縣臣繆琪

校對官中書臣王鍾泰

謄錄監生臣史元善

欽定四庫全書

宋元詩會卷五十五

兵部主事陳焯編

韓信同

字伯循別號古遺與石堂先生同里為  
及門士宋亡不復仕進為雲莊書院長

碁盤仙跡

唐山絕頂碁盤石戲局流傳名自昔殷勤細問白髮翁  
云是仙人曾對奕苔封石磴不敢移竹引清風時拂拭

箇中黑白子不留想是仙童為收拾又不聞採樵之人  
王子質邂逅仙人執手談羸輸未決藏機密貪看柯爛  
不知時少憇山中方七日誰識囊中日月長歸來塵世

無相識

此詩為詠石堂  
山中八景之一

岳王墓

妖星墮地芒角赤龍劍悲吼風蕭瑟中原王氣挽不回  
將軍一死為毛擲秦家小兒真戲劇播弄造化樞樞極  
指讐為親忠且逆隻手上遮天眼碧九重茫茫隔天日

無由下燭臣愚直臣愚萬死不足惜國恥未湔猶憤激  
古墳埋冤血空瀝風雨年年土花蝕我恐精忠埋不得  
白日英魂土中泣請將衰骨斷苔痕獻作吾皇補天石

彭秋宇

宋末人元師南渡有乙  
亥紀聞併秋興詩附見

秋興

沙塵破褐客秋風落落親朋半老翁野曠有時聞嘯虎  
天寬無處寄征鴻四方玉帛燕山北萬里帆檣海水東

回首昇平歌舞地  
芳花石礎樹陰中

乙亥紀聞 二首

羽書朝暮漲氛埃  
天詔勤王起草萊  
塞上風高鷹颺去  
江頭霧暗馬飛來  
諸賢忠愛謀安出  
四將英靈喚不回  
漠漠雲天秋萬里  
飛鳴無數雁鴻哀

西風捲地送淒涼  
目斷歸帆落日黃  
雁過江天雲漠漠  
龍遊滄海水茫茫  
故人入夢三更月  
近事驚心兩鬢霜  
試把濁醪澆磊砢  
樽中猶帶藥蘭香

## 世事

茫茫世事等浮萍  
愁緒方濃醉又醒  
日月雙飛天不老  
干戈百戰地常腥  
此時弓馬多秦戍  
何日箭韶備魯庭  
宇宙西風愁下盡  
誰家門巷草青青

## 林景熙

字惠陽號霽山溫州平陽人咸淳辛未太學釋褐  
官禮部郎宋亡不仕客居會稽會嘉禾揚喇勒智發宋  
諸陵景熙與友人唐珏潛募義士收其棄骨景熙  
得高孝二函併珏所收者葬於蘭亭樹冬青以志  
之其詩有白石樵唱六卷悲  
憤悽惋視謝皋羽為一致云

南山有孤樹

南山有孤樹寒鳥夜遶之驚秋啼眇眇風撓無寧枝託  
身未得所振羽將逝茲高翔犯霜露卑飛觸茅茨乾坤  
豈不容顧影空自疑徘徊向殘月欲墮已復支

故衣

篋中出故衣絡緯聲四壁昔年慈母線一一手所歷春  
春遊子心惻惻虛堂夕逝水不返流孤雲杳無迹空令  
攬衣人一線淚一滴衣敝耐有時母恩無窮期終憐寸



草心何以報春暉朝寒縱砭骨念此不忍披且復返所  
藏永寄霜露思

九日會連雲樓分得落字

冉冉海霧深荒荒山日薄登高集華裾縱目天宇廓落  
葉悲徂年寒英照深酌心醉乃文字意行非澗壑緬懷  
斜川遊此道久寂寞胡為吹帽人白首戀賓幕窮途謬  
行藏異代縣美惡我愛漉酒巾西風不能落

訪二陸故居

風流懷二陸才名動三吳斯人不可作千載空烟蕪當時騁俊筆萬象爭先驅有如明月璧美價傾鴻都世運有翻覆韞匱真良圖惜哉去就乖毀此千金軀人生皆有死百年同須臾獨遺文字芳乃與天壤俱淒淒崑山寒冉冉谷水枯白鶴久已寂黃犬誰復呼荒祠挂殘陽扁舟入菰蒲采蓴薦秋風庶以明區區

納涼過林氏居

出郭已虛曠入門轉蕭森筠樓無六月聊以解我襟紅

日不到地白雲時滿林坐久石根冷酒醒荷氣深飄飄  
黃冠客臨流鼓瑤琴一鼓洗我耳再鼓空我心山高水  
復迴彷彿蓬萊音興盡拂衣去城笳吹夕陰

曉意

僧鐘覺曙鳥紛飛弄林光宿雨漸停雷人起開秋房南  
山忽入几相對各老蒼流泉送日月危石支興亡問山  
山無言啼猿起前岡

妾薄命

盈盈梁家姝奕奕晉朝使解珠不論貲得備巾櫛侍一  
笑金谷春列屋俱歛避豈知錦步溫已復為愁地念主  
惠妾深緣妾為主累樓頭風雨深殘花抱春墜

酬謝皋羽見寄

入山採芝薇豺虎據我丘入海尋蓬萊鯨鯢掀我舟美  
人渺天末瑤音寄青羽自言招客星寒川釣烟雨行行  
古臺上仰天哭所思餘哀散林木此意誰能知

過風門嶺

客來自風門颼颼撼兩袖溪迴衆峰新畝絕一嶺又行  
行春日微怪禽啼白晝流年感花稀古道表松秀聊此  
寄小酌餘酣掬山溜

新豐道中

長颼卷炎埃澄空出秋素迢迢鐵甕城回首隔蒼霧酒  
帘颼荒市笳鼓發深戍倚篷問舟人云是新豐路籬落  
雞欲栖野水牛半渡不見抱琴人斜陽在高樹

商婦吟

良人滄海上孤帆渺何之十年音信隔安否不得知長  
憶相送處缺月隨我歸月缺有圓夜人去無回期回期  
倘終有白首寧怨遲寒蛩苦相弔青燈鑒孤幃妾身不  
出幃妾夢萬里馳

寄周計院

海桑變紛紛秀色見孤嶼山林華髮尊黨遂深衣古獨  
餘釣天夢脩然在巖戶翳翳桂魄灰沈沈槐夢雨江濤  
豈不深脩鱗挂網罟不知義井船秋風繫何許

雜詠酬汪鎮卿

名鼎平陽人二首

百感湊孤夜江樓起呼月秋蟲聲轉悲念此衆芳歇人  
生非金石青鬢忽已雪踰淮橘心移出山泉性汨倚蘭  
抱孤芳不受宿莽沒

權臣坐偃月棄官如飄蓬及茲顛沛秋翻然挺孤忠一  
死未得所網羅挂秋鴻渡淮已不食蜣螂夷齊風何人  
續遷史表為節義雄

石翁嫗

東艾楚俗愚鑄金秦民怖何年斲雲根偶立此翁嫗千  
春衣莓苔偕老食風露世人輕結髮覆水或旦暮乃習  
無情緣永與天壤固父老向我言曾是梁朝墓衣冠化  
黃土古丘亦成路當年殉金棺茲物獨如故閱世如過  
客興亡了不悟時借牛礪角敲火戲童豎

宴德初書樓

樓高不二尋已作百尺想中有湖海豪開襟納萬象頗  
延素心人談笑落清響鄰花吹午香簷竹薦秋爽於中



了行藏此外斷俯仰西樓富熏天歌鐘樂華敞荒涼風  
雨餘山變自來往

寄四明陳楸陽

高人謝世氛誅茅在絕壁十年不下山舊路掩深棘出  
門復踟躕觸步有崩石下臨千仞淵毒鱗正紛籍腥風  
鼓洪濤石齒鳴咋咋失勢倘一落萬縁那可及不如息  
我軀猿鶴與朝夕

春感

柳花滾雪春冥冥溪風一夜吹爲萍萍隨風去渺流水  
人生無根亦如此故山入夢草芊芊半窗疎雨寒食天  
曉來白髮稀可數多少朱顏化黃土高原冉冉青烟斜  
麥飯洒松能幾家子規叫殘金粟暮繭紙蘭亭已飛去  
贈泰霞真士時祈雨有驗

火旂焰焰燒坤垠蒺藜滿道風揚塵槁苗無花不作穀  
老農扶杖田頭哭哭聲不爲填溝渠室罄何以供官輸  
檄龍唄佛寂不應析蜴那能擅權柄泰霞真士鞭風霆

綠章叩天天亦驚玄雲沛雨起膚寸點點都是盤中飯  
須臾收歛歸無聲翩然駕虬出山城我聞調元功自古  
亢爲常暘伏常雨廟堂有道司牧良坐看玉燭開金穰  
淮南捕蝗蝗更在饑蛟齧人陸成海肥羊日日供大官  
論功乃使專黃冠真士寸田無水旱天機子夜交離坎  
錢盛景則教授

空明仙人朝帝所跨鶴凌虛墮霜羽洞中石髓流不乾  
聖泉寫入君肺腑潘江陸海一目盡自提脩綆汲千古

碧芹水冷涵夜燈丹鳳山空鳴曉鼓有時白戰風騷場  
小巫見之縮雙股飯雖不足仁義腴牆陰老薺羹味苦  
丈夫出處各有道天地綱常要撐拄俗吏惟知騁刀筆  
腐儒亦或拘訓詁雲霧窗寒森寶書廣文袖有修月斧  
離亭酒短秋帆開鴈蕩峰前桂花雨

題陸放翁詩卷後

天寶詩人詩有史杜鵑再拜淚如水龜堂一老旗鼓雄  
勁氣往往摩其壘輕裘駿馬成都花冰甌雪椀建溪茶

承平麾節半海寓歸來鏡曲盟鷗沙詩墨淋漓不負酒  
但恨未飲月氏首牀頭孤劍空有聲坐看中原落人手  
青山一髮愁濛濛干戈已滿天南東來孫却見九州同  
家祭如何告乃翁

冬青花

元僧人名嘉木揚喇勒智官釋教總統置署於杭城盡發宋帝諸陵之在越者其骸

骨棄草莽中人莫敢收景熙等痛憤不已相率爲采藥者至陵上拾而收之又購漁人網得理宗顱骨於湖水中作二函託言佛經葬越山因種冬青識之

冬青花花時一日腸九折隔江風雨清影空五月深山

護微雪石根雲氣龍所藏尋常螻蟻不敢穴移來此種  
非人間曾識萬年觴底月蜀魂飛遶百鳥臣夜半一聲  
山竹裂

附唐珣詩

冬青花不堪折南風吹涼積香雪遙遙擎蓋萬年枝  
上有鳳巢下龍穴君不見犬之年羊之月霹靂一聲

天地裂

時雷震  
白塔

又一首

馬箠問髡形南面欲起語野麇尚屯束何物敢盜取  
餘花拾飄蕩白日衰后土六合忽怪事蛻龍挂茅宇  
老天鑒區區千載護風雨

送葛居士住栖碧庵

越山巉巖越臺孤井中雙鯉曾走吳滿坡叢竹遺舊箭  
回首霸業空烟蕪詩人訪古凌絕壁危樓竟欲老深碧  
聲搖孤枕海濤壯影伴瘦筇山月白了然道者亦離塵  
一龕松下分秋雲祇今虎豹滿平陸鍊骨誰與箋青旻

琴心劒氣兩寂寞  
醉墨淋漓風雨落  
九十九峰歸夢寒  
玉笙冷冷跨飛鶴

荷珠

霞衣蔥珮來珊珊  
水晶之宮綠玉盤  
誰與馮夷作戲劇  
貝闕驅入神瓢翻  
又疑罷織鮫人泣  
碧窪融作水銀汁  
圓或為璧方為珪  
寒光滉漾不可拾  
古來歌罷戒覆傾  
真宰之柄常惡盈  
季倫買笑輕百斛  
金谷轉首迷榛荆  
紛紛魚目爭貴惜  
道眼獨縣諸幻息  
須臾海霽山日高



綠雲萬柄淨如拭

鄭宗仁會宿山中

宗仁撲翁也號初  
心平陽焦下人

挑燈懷舊夢移席近春泉  
共話忽深夜相看非少年  
斗垂天末樹燐出雨餘田  
亦有茅簷下飯牛人未眠

道中

程入江鄉宿新炊飯帶沙  
亂山愁外笛孤驛夢中家  
野水平菰葉春風足棟花  
西來三兩客閒說舊京華

宿台州城外

荒驛丹丘路秋高酒易醒霜增孤月白江截亂峰青旅  
鴈如曾識哀猿不可聽到家追此夕三十五郵亭

鄭氏西莊

不踏紅塵道結廬依水鄉遠峰開宿雨高樹表初陽犢  
卧野門寂鴈飛秋稻香午橋花竹地回首已淒涼

溪竹

風高餘暑盡獨策興悠然野色延幽步秋聲入暮年日  
斜禽影亂水落樹根縣回首故人遠城笳吹夕烟

仙壇寺西林

古壇仙鶴杳野鹿自成羣松氣浮清曉經聲出白雲石  
穿僧屋過水到寺門分人世無窮事山中了不聞

寄鄭宗人

城南懷舊別谷口寄春耕野鶴巢雲老林僧管瀑清養  
花疏石髓煉藥伏山精見說孤燈雨年來著易成

葛嶺

度宗賜賈似道新第於西湖葛嶺

不讀霍光傳炫然桃李門湖山變朝市烽火滿乾坤膽

落冰天騎魂飛瘴雨村春花吹秀麥誤國竟何言

京口月夕書懷

山風吹酒醒秋入夜燈涼萬事已華髮百年多異鄉遠  
城江氣白高樹月痕蒼忽憶凭樓處淮天鴈叫霜

宿七里灘

寥落空江上買魚開酒尊亂山含雪意孤艇寄楓根灘  
近不成夢鴻飛欲斷魂偶呼黃帽語一犬吠前村

鹿城晚眺

古城仙鹿遠百感赴斜曛海氣千年聚山形九斗分神  
鴉饑啄蘚宰木蠹藏雲何處鳴鉦發春屯又易軍

初夏

春歸不知處澗戶日初長舊篋題詩扇疎簾讀易香田  
蛙占水旱海燕語興亡復恐閒愁起聽泉過石梁

過陶嶺有錢王井又三里有錢王石菴

沙井泉初試石菴苔已荒不知更宋代猶自說錢王古  
塚木根怪春山雲氣香詩成無紙筆駐馬語殘陽

客意

獨夜愁如此殊鄉老奈何故人經亂少歸夢入秋多衣  
敝鄰碁動書沈海鴈過燈前空拂劍酒薄不成歌

潘山長入括

為官轉多事行役到寒氊落日鄰州樹西風逆水船飯  
牛懷白石訪鶴入青田我欲看行卷仙峰雪瀑邊

答陳景賢

一劍挂寒壁艱危氣不衰鬢痕朝鏡覺書味夜燈知夢

斷潮生枕愁新鴈入詩思君心欲折又負菊花期

薛得之之江東寄熊西玉諸公

乍逢還又別龍竹葛陂陰野水流春遠江雲入暮深  
新知滿湖海遺老在山林邂逅如相問憑君道素心

古松

獨占寬閒地不知搖落天山林猶古色風雪自窮年  
龜伏靈根壽禽巢絕頂仙秦封非所屑幾見海成田

崑巖

神斧何年鑿南山片石盤玉藏仙竒古翠落縣門寒老  
木天邊瘦歸雲雨外殘市塵吹不到朝夕靜相看

桐角

田家無律呂聲寄始華桐碧卷春風老清吹野水空客  
心寒食後牛背夕陽中不惹林花恨年年送落紅

寶林寺

圖上追三笑詩中寄七哀孤樓非絕物多難亦成才歲  
儉朱生竹春寒衣上苔不知遼海客化鶴幾時回



神仙寺訪僧

獨客無清伴，高僧住別村。  
空山卓錫影，斷石繫舟痕。  
風細松生籟，沙虛竹迸根。  
小亭閒坐久，落日嘯孤猿。

趙與別業

已無湖海夢，漸老足閒情。  
野杖日尋壑，家書時到城。  
開池納天影，種竹引秋聲。  
亦愛簞瓢樂，年來世味輕。

夜意

澹然無一事，至樂在書牀。  
老石棲雲定，疎松過雨香。  
砧

清秋巷迴燈白夜堂涼此意無人會重城醉夢鄉

天台隱者

俗駕不曾到瘦筇時復攜肺肝清澗飲鬢髮老巖棲野  
巷猶雞犬春城自鼓輦未應人世外別有武陵溪

新昌道上

江湖猶是客歲月已成翁僊路重雲外人家落木中山  
痕經燒黑土脉入泉紅又得春風信孤花照驛東

越中送徐君寅歸閩

此地同爲客當秋獨送君斜陽留薄醉遠道惜輕分老  
淚遺陵木鄉山出海雲天南有回雁音信倘相聞

故宮

驚風吹雨過歷歷古槐蹤王氣銷南渡僧坊聚北宗烟  
深凝碧樹草沒景陽鐘愁見花飄月荒秋咽亂蛩

辟雍

冠帶百年夢昔遊今重嗟璧池春飲馬槐市暝藏鴉堂  
鼓晨昏寂廊碑風雨斜石經雖不火歲歲長苔花

孤山

回首咸平夢清風自滿湖乾坤一士隱身世此山孤鶴  
去空秋影梅開向舊株耳孫今白髮持酒酌寒蕪

舟次吳門

懷古心猶壯臨流影自孤湖烟迷攜李城水出姑蘇草  
暗春驚鹿菰香秋試鱸青樓舊時月無復聽吳歎

釣臺

曾來天上宿夢不離寒磯宇宙雙臺迴烟波一客歸姓

增江郡重墓隔越山微千古登臨意淒涼帶夕暉

過北鴈蕩山下

驛路入芙蓉秋高見早鴻蕩雲飛作雨海日射成虹一  
水通龍穴諸峰盡佛宮如何靈運屐不到此山中

禹廟

萬國曾朝會羣山尚鬱盤嚴祠鎮玄壁故代守黃冠芝  
入雲根古梁歸雨氣寒年年送春事來拂蘚碑看

荷錢

盈盈新疊碧難借柳條穿鑄景菰蒲外買隣鷗鷺邊炎  
官初掌柄水國不書年漸長熏風價折筍供酒船

訪武伯山居

照書雙眼碧天欲壽斯文白髮前朝士青山半屋雲遲  
花春後見遠瀑夜深聞回首重華夢荒田自鹿麕

漁笛

楚竹聲何遠蒼茫想釣舟橫當半篷月吹破一江秋落  
葉紛前浦驚鴻過別洲曲終枕蓑卧無夢到涼州

雪夜

開簾殘酒醒雪意尚垂垂  
夜色沈奎久春容變柳遲  
寒塘鷗自散荒歲雀同饑  
便欲誅茅隱何山有紫芝

山中早行

短策穿幽徑山樵半掩扉  
月斜林影薄石盡水聲微  
一犬隔籬吠孤僧何處歸  
相逢松下立風露滿秋衣

溪亭

清秋有餘思日暮向溪亭  
高樹月初白微風酒半醒  
獨

行穿落葉閒坐數流螢何處漁歌起孤燈隔遠汀

獨夜

客鬢雙蓬老拾遺一燈明滅酒醒時百年回首忽成夢  
萬竅有聲皆是詩殘夜月枝烏未穩故鄉水草鴈多饑  
袂衣初試新霜冷欲折黃花寄所思

答周以農

平陽睦源人號稼村

一燈細語煮茶香雲影霏霏滿石牀萬里夢魂形獨在  
十年詩力鬢俱蒼山空絡緯悲秋雨水落簷葭足夜霜



未會漆園觀物意酒闌猶發次公狂

歸白石故廬

四鄰井竈出荒墟獨鶴歸來認舊廬  
一逕蒼苔供瘦策半簪華髮伴殘書  
斜陽巷陌語初燕新水池塘生細魚  
小立春風憐寂寞忽吹花片入襟裾

春暮

乾坤萬事上眉端寂歷東風獨倚欄  
白髮餘春能幾醉綠陰細雨不多寒  
香飄苔逕花誰惜影落沙泉鶴自看

碧眼野僧知我意素琴攜就竹西彈

酬潘景玉 二首

喚起離愁落木聲抱饑猶自向書耕江湖有夢追前事  
天地無根笑此生歲晏斷鴻羈客影夜深殘火故人情  
幸來相就分岑寂閒對梅花酌翠觥

讀史雙眸夜炯然一聲江鴈落燈前馬非汗血材終下  
木或青黃性不全風月未容詩入務乾坤應許酒為年  
寒城日出無窮事老耳山中獨聽泉

答柴主簿

聞采秋荷自製衣相逢舊雨語依依學窮蝌蚪心空老  
夢跨蟾蜍肉不飛幾喚江帆和鴈渡長歌巖戶見雲歸  
何須化鶴千年後城郭人民半已非

答鄭即翁

初陽蒙霧出林遲貧病雖兼氣不衰老愛歸田追靖節  
狂思入海訪安期春風門巷楊花後舊國山河杜宇時  
一種閒愁無著處酒醒重讀寄來詩

雲間懷古

熏風短擢水粼粼老鶴疎林寂不聞  
內史祠荒殘碣雨黃門書冷半堆雲  
獵場斜日分桑塢馳道深秋走鹿羣  
寥落一觴誰弔古漁鄉烟景客平分

過吳門感前遊

回首前遊夢未忘江雲漠漠樹蒼蒼  
客心空老鶯花月詩貌不肥魚稻鄉  
白虎氣銷遺瘦石綵虹影冷卧斜陽  
當時已歎來麋鹿後二千年更斷腸

元日得家書

爆竹聲殘事事新  
獨憐臨鏡尚儒巾  
寒窗琴冊燈花曉  
衰鬢江湖栢酒春  
道在老天扶客健  
書來稚子識家貧  
舊山亦有閒風月  
歸與漁樵作主人

次翁秀峰

花柳湖西別此翁  
十年鬢雪忽重逢  
唐陵愁問永和帖  
楚水夢聞長樂鐘  
黃嬾秋燈餘舊癖  
素侯野服拜新封  
世情雲雨何時了  
千古青青太玉峰

寄七星人

七星山平陽州北五里鄭初心先生隱其中

十年疎鬢為誰斑  
天借儒冠日月閒  
欹枕寒生雙瀑澗  
開門春滿七星山  
鶴歸尚覺遼城是  
鵲老空聞蜀道難  
欲覓九還憑寄語  
青牛何日度函關

和王德游夜感

小池荷淨雨初晴  
世念消磨未到僧  
衣帶長江空北固  
觚稜舊月隔西興  
一春空負花前酒  
獨夜相知竹下燈  
自笑老來甘鷁退  
少年雲路健追鵬

酬合沙徐君寅

合沙福州郡稱

歸鶴悠悠渡海遲  
閒來野寺看僧棋  
鄉心荔子熏風國  
客路槐花細雨時  
天地一身愁自語  
江湖諸老淡相知  
烏絲醉後淋漓墨  
片月涓涓照硯池

立秋日作

苦熱如焚想雪山  
清商一夕破愁顏  
炎光斷雨殘虹外  
涼意平蕪遠樹間  
忙踏槐花猶入夢  
老催蒲扇共投閒  
城頭遙望累累塚  
遼海荒寒鶴未還

王監簿南墅新樓落成

玉珮珊珊不可招，眼空塵界等秋毫。  
山林貞白三層迥，湖海元龍百尺高。  
自笑行藏關氣數，肯將歌舞換風騷。  
卷簾最愛南山近，坐聽松聲起碧濤。

訪僧鄰菴次韻

拂石題詩滿袖嵐，尋僧又過竹溪南。  
乾坤浩蕩酒鄉寄，山水蒼寒琴意參。  
老燕未歸同是客，孤雲無住孰為菴。  
寂寥午夜松風響，疑是神仙接麈談。



新晴偶出

琴牀茶鼎淡相依  
偶爲尋僧出竹扉  
風動松枝山鵲語  
雪消菜甲野蟲飛  
看花春入桺榔杖  
聽瀑寒生薜荔衣  
古寺無人雲漠漠  
溪行喚得小船歸

雲門即事

最愛林中過客稀  
坐分片石淡忘歸  
僧閒時與雲來往  
鶴老不知城是非  
瀟灑山光秋入畫  
清寒花氣曉侵衣  
一溪截斷紅塵影  
西有任公舊釣磯

寄林編修

名千之平陽人

大雅凋零尚此翁  
醉鄉一笑寄無功  
衣冠洛社浮雲散  
弓劍橋山落照空  
東魯有書藏古壁  
西湖無樹挽春風  
巾車莫過青華北  
城角吹笳送暮鴻

喜劉邦瑞遷居采芹坊

并鄉聚散笑恩恩  
歲月無情忽兩翁  
燈火城南聽夜雨  
桑麻社曲憶春風  
百花新意皆歸燕  
萬里離愁獨寄鴻  
重約扁舟尋禹穴  
夕陽疎樹亂雲東

讀秦紀

瑯琊臺上晚雲平  
虎視眈眈隘八紘  
萬里不知人半死  
三山空覺草長生  
兆來鬼壁沙丘近  
威動神鞭海石驚  
書外有書焚不盡  
一編紀上漢功名

項羽里

英雄蓋世竟何為  
故里淒涼越水涯  
百二勢傾爭逐鹿  
八千兵散獨乘騅  
計疎白璧孤臣去  
淚落烏江後騎追  
遺廟荒林人酹酒  
至今春草舞虞姬

陪王監簿宴廣寒遊次韻

銀橋疑駕海天長  
丹粟離離照翠觴  
影浸山河瓊殿冷  
舞深風露羽衣香  
亦知廣莫元無野  
却笑溫柔別有鄉  
手折一枝驚昨夢  
素娥憐老授玄霜

漁舍觀梅

冷雲漠漠護籬陰  
瀟灑苔枝出竹林  
影落寒磯和雪釣  
香浮老瓦帶春斟  
幾憑水驛傳芳信  
祇許沙鷗識素心  
回首西湖千樹遠  
扁舟寂寞夢中尋

虎丘寺

突兀僧房倚翠微，金精幻虎霸圖非。  
瓊田萬頃山如湧，鐵壁千尋澗自飛。  
堂在經聲通老石，樓開塔影落秋衣。  
千年幽獨嗟誰氏，斷刻苔深帶夕暉。

鶴林寺

流水蒼松石逕斜，甕城城外梵王家。  
仙林不返雲巢鶴，僧鉢曾移海國花。  
剝落苔碑秋卧草，荒涼竹院午敲茶。  
當時一擲乾坤手，曾向山窓倚暮霞。

焦山寺

山裏中流水作林寶蓮鰲背翠沈沈半空但覺烟嵐合  
三面不知風浪深仙井浴丹開曉日海門浮玉澹秋陰  
洞深瑤草無人采瘞鶴殘碑浸碧潯

寄葛秋巖

吳地繁華半劫灰故山秋遠夢頻回琵琶亭老春風權  
桑落洲寒夜雨杯歲月悠悠人幾換關河渺渺雁空來  
酒酣欲寄登臨眼黃葉斜陽滿廢臺

用韻寄陳振先同舍

心事淒涼寄雁聲  
石田苔滿未妨耕  
西風戍角催年換  
殘夜江樓見日生  
煮茗敲冰貧有味  
看花隔霧老無情  
湖山猶憶笙歌底  
笑領春香綠滿觥

贈天目吳君實

詩興翩翩度雪溪  
巖雲半護舊畱題  
夢回殘月蒼梧曉  
家在春風秀麥西  
萱草堂深衣屨寄  
桃花觀冷酒重攜  
故山石鏡無人問  
空與寒猿照影啼

東山渡次胡汲古韻

客來持酒灑烟霏空想高風意欲飛老洞藏雲安石卧  
孤舟載雪子猷歸一川白鳥自來去千古青山無是非  
欲上危亭愁遠眺廢陵殘樹隔斜暉

家則堂先生生還

瀕死孤臣雪滿顛冰蘊齧盡偶生全衣冠萬里風塵老  
名節千年日月懸清唳秋荒遼海鶴古魂春老蜀山鵑  
歸來親舊驚相問禾黍離離夕照邊



題陸大參秀夫廣陵牡丹詩卷後

南海英魂叫不醒  
舊題重展墨香凝  
當時京洛花無主  
猶有春風寄廣陵

歸自越避寇海濱寒食不得祭掃

持酒無因洒墓松  
禽聲花色慘東風  
去年此日身為客  
及到家山又客中

山窓新糊有故朝封事藁閱之有感

偶伴孤雲宿嶺東  
四山欲雪地爐紅  
何人一紙防秋疏

却與山窗障北風

蘇小小墓

錢塘名倡有墓在嘉興縣西南六十步

歌扇風流憶舊家一丘落月幾啼鴉芳魂不肯為黃土  
猶幻燕支半樹花

夢中作四首

按景熙既造石函瘞宋諸陵骸骨於越山樹冬青識之作冬青花詩矣而

復繫以絕句當時不敢明言但託為夢中作然此四首據所江鄧元錫定為唐珣之詩考唐珣與鄭宗仁皆景熙一時同志圖茲義舉者唐既別有冬青花古體二章而絕句聲調與景熙近且又原載林集內則此詩仍當屬林恐所江未之深考也

珠亡忽震蛟龍睡軒敞寧忘犬馬情親拾寒瓊出幽草  
四山風雨鬼神驚

一坏自築珠丘土雙匣猶傳竺國經獨有春風知此意  
年年杜宇泣冬青

昭陵玉匣走天涯金粟堆前幾暮鴉水到蘭亭轉嗚咽  
不知真帖落誰家

珠鳧玉鴈又成埃斑竹臨江首重回猶憶年時寒食祭  
天家一騎捧香來

葛仙翁石牀

釣天夢破珊瑚枕巖壑春供翡翠屏一卷黃庭雲半席  
宵深讀與嶺猿聽

館娃宮

苧羅山女入宮新四壁黃金一笑春步輦醉歸香逕月  
隔江還有卧薪人

聞蟬二首

翼綃微動自宮商幾曳殘聲送夕陽喚得槐柯芳夢覺

熏風一曲換西涼

近交紙薄雲翻手  
舊夢冠空雪滿顛  
却憶畫船曾聽處  
夕陽高柳斷橋邊

夢回

夢回荒館月籠秋  
何處砧聲喚客愁  
深夜無風蓮葉響  
水寒更有未眠鷗

牟嶽

字陵陽原蜀人僑居吳興父諱子才諡清忠以直  
道事理宗爲名臣嶽官大理少卿於度宗朝即退

居不出其子應隆字伯成咸淳丁未進士宋亡元大臣招之不應後起為上元主簿輒致仕父子皆嗜學嗽妻鄧夫人李心傳外孫也

九日和陶

翁媪兩白髮蕭然老江干大兒荆溪遊折腰豈為官諸兒走異縣亦各營一餐別多會面少端復坐饑寒諸幼且眼前笑語開我顏勿問賢與愚懷抱俱相關

送婁伯高遊吳

桃花水暖清明前長隄柳色青如烟男兒年少重意氣

春風買醉吳江船西湖三月春更好笙歌錦繡神仙島  
紫燕樓深翠黛閒碧羅天淨揚花老興亡往事置勿論  
千金不惜酬歌樽酒酣莫作後庭曲遊人思斷江南魂  
去去知君訪陳跡吳水吳山青歷歷花殘鈿碎館娃空  
春草年年為誰碧君行正樂我為愁白髮送君思舊遊  
平生漫浪無似我努力功名湏黑頭

和趙君寶宣慰

平生知我一季及別後牢闔白版扉偶有客來孤鶴起

也無人覺小舟歸從教俗子頻相惱只恐仙禽未肯飛  
莫怪近來書問絕醉眠林下兩忘機

方逢辰

號蛟峰浙人宋亡高隱不赴徵召與何潛齋倡  
和山水間其猩猩篇雞雛吟極爲潛齋所賞

送潘翠谷

無屋住僧廬無菜挑野草野草風味長僧廬人跡少剝  
剝誰扣扃訪予事幽討錢塘有騷翁自號翠谷老匹馬  
遊南牆要伴松竹好遐思到山人迂尋出詩藁詩無愁



苦吟掃退郊與島胸次鮑明遠筆下王逸少我觀陰與  
陽禪代何時了不能為魯連尚可作商皓長歌黍離篇  
酌酒問旻昊

猩猩歌

獵者圍猩猩疑其以衆抗誘曰不取小惟取大與壯衆  
猩自相仇推擠送其長以次索二三不復推已往四五  
至于十無一得釋放衆猩怒相目各悔受人誑及早同  
一心未必軀盡喪吁嗟獸不靈相仇無足嗔胡為豪傑

羣不能自相親秦人吞六國諸侯各附秦併力取其一  
冀不及他人智者欲合從徒自腐舌脣安得先震鄰然  
後於其身彼先噬其一其次禍亦均早知秦用術六國  
同一心

按此篇與雞雛吟最為世所傳誦但雞雛之作借談良知不免近腐故刪之

題盧文峰十二知丞文集

驪珠一顆千仞淵漁翁探得遭驪眠一朝吹墮千萬顆  
恐是蛟驪卧半天駢花儷葉妙天下文賦直追古班馬  
手挾河漢裂錦章寫在詩歌軋騷雅大篇赤手捕長蛇

不須控勒騎生騶短篇任意起忽伏蒼江浩浩濤中差  
文章妙手壓場屋到底亡羊還得鹿廬陵方買載月舟  
清談又展朝天軸軍將打門書一封呼起醉夢為醒鬆  
只怕至寶不肯畱山中雷霆風雨取去還蛟龍

田父吟

清溪渺如斗大邑萬山壁立土磽瘠百分地無一分田  
九十九分如劍脊一畝之地高復低節節級級如橫梯  
畝心一畦可一畝邊旁一畝分數畦大家有田僅百畝

三十畝十八九父母夫妻子婦孫一奴一婢成九口  
一口日噉米二升茗齏醬菜與薪共來日費二三斗  
尚有輸官七八分小民有田不滿十鎰方放手有菜色  
曹胥鄉首冬夏臨催科差役星火急年年上熟猶皺眉  
一年不熟家家饑山中風土多食糜兩兒只肯育一兒  
只緣人窮怕餓死可悲可弔又如此有司猶曰汝富民  
手執鞭敲目怒視今年淫雨天作難洶湧澎湃四五番  
浮尸蔽屋環江下迸山裂地如鯨奔半山都成水澤國

平地皆作龍蛇窟水頭晚退早復來屋角朝出夕又沒  
巋然令丞簿尉衙下視四境無人家水平歸家無屋住  
有屋住者無生涯農氏拋家認畝隴擔砂翻石肩皆腫  
百千一畝判晚秧一丘分作兩丘種都來一畝無百千  
買秧已費半百錢眼前揀種已剗肉向後豐歉猶在天  
晚田再種未可保早田無秧為出草皂衣旦暮來搥門  
今年苗稅催須早打快織機趂頭綱作急糴米輸苗倉  
更有一言牢記取斷不許人言灾荒

題吳氏梅堂

聞君家在雪邊住，靠盡欄干索盡詩。  
只怕梅花應冷笑，清香元不要人知。

宋元詩會卷五十五

欽定四庫全書

宋元詩會卷五十六

兵部主事陳焯編

谷音集

王

澮

字元佐遼東人

澮博學醇行博州刺史史迎為師表教授弟子百餘  
金貞祐中就拜宣撫遼東宰相累書請澮之鎮澮  
不應浮  
海遯去

河之坊矣

河之坊矣截截其平豈曰不力言持其盈國慨覆矣視爾  
夢夢云胡昊天不終惠我生云胡昊天疾威堂堂輾轉翫  
日四國卒荒偃仰在位不知匪臧不顧其行有粟有粟亦  
集於缶則不敢饘抑餬余口諱曰哲矣孰秉其咎知我慢  
慢不知我疾陟彼南山石其扁矣戒爾勿傷足其跂矣啗  
啗昏昏顏之覲矣倚余何言涕之泣矣民之種種具曰贅  
疣弗於爾躬曷云能瘳勗哉夫子保爾有位慎爾為猶

感遇 四首



迅景走北陸高木交朔風衆情悅妖冶豈云惠其終萬  
事無不有流轉大化中古來論成敗咄咄魚為龍牛車  
竄下國勢異情則同蒲姚本狙擊桓桓湯武功彼美二  
三子一笑清酤空

兩虎鬪中野利乃歸衡虞血肉相蹂躪鼓吹行通衢獨  
倚剛膂力箕踞傾百壺未必非禍福凡百持爾軀吾聞  
畏虎羆吹竹不枝梧

光風蕩繁囿丹綠綴柔柯遊子去萬里空閨歛翠蛾行

雲落江水酒盡不成歌  
難飛與狗走妾命獨奈何

槁梧蒙紱冕崢嶸化侯王  
餐餌先百牢蘭烟浮玉房  
兒女何所見拜跪色甚莊  
四海正聾瞽威靈爾翕張  
哀哉杞梓材棄捐官道傍

贈段十

相識風塵下斯文伯仲間  
騎驢逢聖日捫虱對秋山  
忠信偏成拙支離最得閒  
秦川貴公子早計失荆蠻

程自修

字忘吾洛陽人

自修性孝友讀書城東門翰林元裕之上  
其言行除禮部郎中自修聞之棄家南去

### 獨坐

終南在吾目秋色遠接應誰招天外翠來作窓中靚娟  
娟初畫眉盈盈獨臨鏡雲去物象空月出心源瑩我欲  
往從之有客誇捷徑洗耳復洗耳松風入清聽

### 歲云暮矣

歲云暮矣百工休獨持千古供素遊丈夫磊落如天日  
促促胡為升斗謀望塵下拜乃東市山中茹芝可白頭

嗚呼此道棄如土眼中歷歷聖賢蠹鄉里小兒紇那歌  
前輩先生八風舞欲挽東流無萬牛抱膝長吟聽更雨  
痛哭

日射石虬鱗甲開草色又換青春回精靈聚散豈拘束  
山鬼叫呼松栢哀當時沸天簫鼓動今日悲風陵上來  
恩恩今古誠傳舍人生有情淚如把乾坤誤落腐儒手  
但遣空言當汗馬西晉風流絕可愁悵望千秋共瀟灑

王猛墓

男兒有才須有識死葬荒陲真可惜君不見渴虎不飲  
盜泉水始吾虞君今已矣

歸龍門

來往空書札行藏但布衣直為知己用可惜轉頭非歲  
月百憂集江山一笑歸禰生狂到死君子要知幾

出城

束帶供人事扶藜強病身誅求非上意盜賊本良民濕  
翠山藏雨輕黃柳帶春小兒隨白首行坐各沾巾

送元吉歸河東

獨憐風格困塵埃，敢料天涯共酒杯。  
花鳥偏于前輩好，江山更有後人哀。  
顏回盜跖終歸命，諸葛曹丕豈論才。  
正自別離愁未透，更教柳色帶青來。

冉

琇

字溫季瑯琊人

琇好縱橫談業漁獵世為李氏客難且作琇累書  
止之不聽乃南走渡江聞璵滅東向三哭伏劍

過臺

遊目過臺上，烟色秋曖曖。  
當時駐文輿，君臣良宴會。  
歌

鐘正喧喧華纓接飛蓋行樂遞未央已見顏色改爽鳩  
焉可知齊景尚何在世運如日月朝夕還相代

秦吉了

有鳥秦吉了鳴聲一何悲自言承主恩十載供提攜雕  
籠閒羽翼繫之雙華絲一朝不終惠零落投荒陞自傷  
去中土豈不懷南枝誠堪利主家生死不敢辭努力萬  
里風寄此長相思

蓬萊閣

倚闌吟不就看劍老相催鳥逐孤雲沒帆從別國回魯  
連惟有死王粲不勝哀為問依依柳秋聲何處來

海州

波濤起天末舟楫滿城隅管晏非王佐田韓有霸圖何  
門堪跂履吾道欲乘桴倚杖春風近含愁向綠蕪

宿京口

推篷在京口山色對秋眠搔首半帆落懷人孤月縣形  
骸成獨往風物媿流年隨處逃名姓烏啼又發船



獨立

獨立春將晚周遊道正窮江山千古後形影百年中士  
論元無的人生各有終臨危負知己淚落海雲東

元吉

字文中河東人

吉太原大俠也報仇市上吏來捕更殺吏走太行  
谷中會赦歸乃絕嘗與遊者三年通左氏史記家  
益貧入元甲子  
從戍開平道卒

自葫蘆河至居庸關

男兒不成名命也負羈縲投袂出門去浩蕩破邊色飛

沙白盪胸落葉黃沒膝微陽割層暝山骨緊格格抉眼  
已崢嶸置身何突兀健鷗勢欲落老馬志亦屈氣岸勇  
枝梧脈絡大包括物候秋冬交土風中外隔懷歸畏簡  
書欲往投鬼蜮無言答酸楚有血灑寥閭古來喪亂中  
天地坐跼蹐形骸盡則已烈士裹馬革

上黨

怒山出老拳寒色頑巔巔城根挿沙水斗絕虎相視憶  
昔宣武兵最強合圍步驟如搯吭那知一叱立破散誰

道亞子口尚黃鳴呼皇天肯悔禍豈有盜賊稱天王要  
畱千古論曲直故壘依稀榆葉赤

陪翟三遊平州東城

老境逢春色平州聚德星不堪歌勅勒并欲案丁零雪  
泥殘年白山呈太古青殊方更分手暮角若為聽

早發博州

落落空城在蕭蕭獨客歸古今殊未了心迹每相違魏  
國山河美唐家節度非偷生慚宿鳥霜月上征衣

夜坐

森森夜氣落寒欄  
閒把離騷酒正酣  
忽憶梅花不成語  
夢中風雪在江南

孟

鯁

字介甫曲阜人

鯁沈毅雄略歲癸亥山東兵欲起劫  
鯁計事甲者三至鯁不肯遂遇害

徐州

徐州壓城霜木楮可能回首風塵下  
當年縞素從西來  
仰天伏地聲嗚啞  
君臣大義日月白  
牧馬鳴條此其亞

帝王氣象佳蔥蔥舉止却類田舍翁美人瓊玉是糞土  
四海正在水火中如龍如虎尚蹉跎况乃豎子貪天功

### 猛虎

猛虎被束縛皮肉不相保人生到錯迕天地亦草草古  
來割據何代無可憐百萬殉匹夫漁陽突騎如風火青  
州城門鐵作樞丈夫好在識時務座上赤龍公莫舞沙  
海荒荒魂不歸莫說青州淚如雨

### 南京

惜惜坊陌傍深春  
活活溪流雨過痕  
花鳥幾時充貢賦  
牛羊今日上丘原  
猶傳柳七工詞翰  
不見朱三有子孫  
我亦前生梁楚士  
獨持心事過夷門

折花怨

息息杯酒又天涯  
晴日牆東叫賣花  
可惜同生不同死  
却隨春色去誰家

安如山

字汝止廣漢人

如山善擊劍左右射讀經史百氏之書端平甲午  
安撫曹友聞辟掌書記不起友聞戰死三泉如山

往收其骨藏諸其先人之側乃東下老子會稽

### 曹將軍

將軍精悍姿齒齒碎鐵石在昔童稚中但聞飽經術縱  
橫騁柔翰丹雘間金碧有司塞明詔敝邑屈詞伯芹香  
春水生冠玉侍重席脫略章句陋搜抉窮理窟未及丈  
化成其如王土窄大夫報主願豈必蒙清秩蒼皇請去  
位滿面秋栗烈糾合熊虎羣旌旆揚廣陌正當摩厲間  
一鼓拔勍敵屯兵沔水源千里斧截截浩蕩排煙旻西

極安嶠岫奈何國無人腐儒秉旄鉞賞予入私門金湯  
授盜賊公時奮臂爭反遭獻玉刖三軍視馬首慟哭下  
天壁功成坐齟齬憤怒鬚插戟中宵拔劍起肅肅整勁  
翮吐氣風雲生塞旗陷堅列貫穿死生地蹀血天地黑  
勢雖衆寡縣形未雌雄決路窮斷首尾衆盡乃手格豈  
知龍虎逝黯淡山川色百萬尚震驚嗚呼死諸葛長城  
但自壞千古痛稠結肉食無遠謀野史有直筆酒酣歌  
節士晶晶霜日白



下瞿塘

去去如奔馬來來無盡船人心似江水日夜向吳天

王

翥

字一飛成都人

翥篤學尚氣吳曦謀反來請翥翥陽病風瘖  
潛往安丙謀誅曦事定匿巴中爲農終身

灌口秋漲

所向愁無地窮源欲上天蛟龍胡爾怒鷗鷺更誰憐萬  
里朝宗意羣鳧跋扈年生涯秋色裏獨立問漁船

憶舍弟

藥物吾仍病花時汝未歸不眠愁月落獨立看雲飛詩  
禮自持律飢寒誰解圍遙知理舟楫西望涕沾衣

浮世

浮世惟高枕平生有敝裘江花中酒日巴雨落帆秋老  
矣英雄事愚哉盜賊謀啼猿長自在一笑下滄洲

吳宣撫故宅

社稷疲奔命乾坤服至誠扶持三蜀在出入兩朝榮豚  
犬有遺恨麒麟空復情家聲隤已盡國法用猶輕成季

翻無後花卿浪得名門庭黃鳥語几杖綠苔生威福何  
偏重精神恐不平庶幾蒙世美凡百慎持盈

送張判官歸巴州

回首三巴曲平生萬里橋衣冠無賴客花月可憐宵

師嚴字道立襄陽人

嚴讀書識大義善禦射自園中拔身走行  
在所上書論事不報拂衣去客死武陵

大閱

長江天險設荊州國西門幕前仗斧鉞赫赫齊尊熊

罷在掌握百萬不敢喧固列厓嶠立動色虹蜺翻雖云

缺

亦是明主恩高秋鼓角壯慘淡傷精魂山南正  
困危血肉連川原由來多壘辱豈不在大藩既同事王  
室於義如弟昆勗哉從簡書卹鄰古所敦

蘭五見訪

漢陰美人青兕裘獨騎瘦馬尋荒丘花前下馬迎一笑  
珠玉在側形骸羞酒酣散髮箕踞坐錦帶爛熳縣吳鉤  
斷蛟刺虎好身手碧瞳如水涵清秋惜哉科目大脫略

壯士豈為章句囚中原格鬪困不已江波木落寒悠悠

渡江

鹿門山人滄浪客灑淚已枯眼見骨風塵崢嶸萬里空  
不知何處營三窟城中性命湯火近路窮援斷無消息  
鼠竊狗偷何足憂都將十指漫天日大言濶步好公卿  
三百年餘涵養成已聞鄭五但搔首復道龐涓豎子名  
平時肉食誇果決誰信臨危跋扈行白頭面皺牙齒落  
萬事已矣秋風生

庚午三月五日朱尚書席上醉歌

天風浩蕩何處來荆南府中好春酒我公此日盛賓佐  
但飲無勞問升斗座中十萬無下箸烏帽朱衣牛馬走  
妙舞清歌如有神翠爛金明各回首人生行樂須壯年  
小人再拜為主壽滿堂淚落起挽鬚臨饋三歎成鬱紆  
干戈未定郡國破亂臣賊子何代無主憂臣辱坐感激  
忍對花鳥調歡娛近聞士卒願一戰猛氣正倚風塵麓  
丈夫行事動千古快意一飽非雄圖

武陵客居

浩蕩千年調飢寒八尺身不愁逢魍魎可笑繫麒麟殘  
雪江村路空山澗水春時危終遠去道在豈全貧

公安早發

去國秦公子窮途阮步兵別離如昨日豪俠異平生江  
月為誰好巴船何處行高秋伴搖落早發若為情

張

琰 字汝玉廣陵人

琰身七尺長髯個儻有節槩補州牙兵隨制置李  
庭芝潰圍南赴行在所追者及之麾下鳥獸散琰

獨闢  
死

出塞曲 四首

腰間插雄劍中夜龍虎吼  
平明登前途萬里不回首  
男兒當野死豈為印如斗  
忠誠表壯節燦爛千古後

朝發山陽去莫宿清水頭  
上馬左右射捷下如獼猴  
先發服勇決手提血髑髏  
兵家互勝負凡百慎前籌

驅馬飲淮水千里黃草平  
種穀卻流血痛哭秋風生  
寡妻出租稅孤兒荷戈行  
武威既不足願見和親成



軍中日秦凱鼓行遼海東當寧怡玉色千金勞成功焉  
知昨日地袒甲去如空邊人不敢語將軍益褒崇

官柳

不見橋東黃布帘樹猶如此我何堪裊裊亭亭感無賴  
又將春色誤江南

汪涯 字萬頃漢陽人

涯家貧事母孝宣撫賈似道請為客當作露布獻  
捷涯瞋目曰啗人以利而退其師又兒弄主上似  
道大怒撻殺之其母曰汝以直死我  
則不屑可以下報先君矣亦自沈

采石獨酌

欲落不落月在手百年幾何持釣綸不知春色萬象表  
綠烟漠漠入江濱天翻地覆有今日酒熟詩溫無可人  
向來談笑成黃土墮淚未了難司晨

江帆

江帆去去可腸斷千古萬古越王臺掃空黃葉晚風定  
飛盡碧天晴鳥回半生無成坐筆硯萬事不理問樽罍  
年年看梅今白首已矣英雄畱七哀

江行

江陵白魚如斫玉挂席獨去風日寒封題兩甕寄白髮  
兒涯不是作魚官

秋光蕩漾滿行色鄰舟吹笛不堪聞洞庭濯足一尊酒  
夫君不來空白雲

詹本 字道生建安人

本溫言正行丞相江萬里薦為郎先致書本本方  
坐門前石上釣使者至問本居本不答即持竿渡  
溪去莫知所終

春日攜客遊武夷

山脚健枝梧百里插蒼峭  
粼粼石可把曙色坐遠釣風  
水真筌筍歷落太古調衣冠帶莽蒼  
山鬼驚二妙雲月  
正忘年花鳥更索笑迴船翠凌亂  
吾道付長嘯

宿天台

風泉隔西屋獨夜寒自生  
開窓失山色白雲壓前楹  
累盡得瀟灑去住俱不驚  
鼻息叅僧鐘霜露入殘更

閒中

萬事問不知山中一樽酒埽石坐松風綠陰滿巾袖

皇甫明子

字東生四明人

明子性豪宕乘小舟挂布帆載琴尊書籍  
釣具往來江湖入元丙子發狂痛哭蹈海

海口

窮島迷孤青颶風盪頑寒不知是海口萬里空波瀾蛟  
龍恃幽沈怒氣雄屈蟠崢嶸挾秋陰挂席潮如山熒惑  
表南紀天去何時還雲旗方慘澹腰下青琅玕誰能居  
甬東一死諒非難嗚呼朝宗意會見桑土乾

京口行

京口兵可用酒可飲一語參差族成血忠賊相持各凜  
凜豈知好醜隔形骸父為孔鸞子為鳩人衆天定理則  
那遺臭流芳且高枕

水國

水國淒涼住秋宵爛熳眠歸雲猶帶雨墮月忽明船社  
稷資長算髭鬚近暮年亂離棲不定百口託浮田

丁開

字復見長沙人

開負氣敢言安撫向士璧被問開獨詣闕上疏具  
陳士璧功大軍府小費不宜推究書奏羈管揚州

歲餘

卒

漂泊岳陽遇張中行因汎舟洞庭晚宿君山聯句

元氣無根株

開

地脈有斷絕

中

日月互吞吐

開

雲霧自

生滅

中

楚妃結幽想

開

巴客答清映

中

假巨鼇力勢閱南紀浮

開

思隨西風發形影寄孤舟

吾道成缺舌笑談正凌傲

開

俯仰不偏側每與景物會

中未省歡娛畢疊翠晚悵悵

開

墮黃秋's's魚龍負鼎

扇行獨鳥去不息曠原眇周抱

開

異境超恍惚徑度萬

頃空

中行

忽得一拳碧稍稍雞犬近

開

依依鍾梵夕推門

月微墮

中行

煮茗香初歇衣裳識霜信

開

瓶鉢了禪悅事

定心源清

中行

夢回斗柄直周遊興欲盡

開

長往計未決

出門更回首

中行

沙水盪虛白美哉神禹功

開

已矣三苗

國山川長不朽

中行

愚智俱可惜神交正冥冥

開

指點空

歷歷慎勿語俗人

中行

桃源恐相失

開

可惜



日者今何及天乎有不平功高人共嫉事定我當烹父  
老俱嗚咽天王本聖明不愁罹黨禍攜淚向孤城

揚州歲暮

萬國春回日層城晚眺餘江聲隔吳楚原色到邳徐大  
閱軍容壯狂歌客禮疎百年寒荻裏風雨憶吾廬

建業

誰遣淒涼滿眼中蘋花渺渺又秋風龍蹲虎踞江山大  
馬去牛來社稷空縱有千人惟諾諾本無百歲更怱怱

乾坤顛倒孤舟在聊復殘生伴釣翁

鮑

輓字以行括蒼人

輓嗜酒授簡萬言教授得錢悉送酒家遇客  
盡飲乃去晚益傲誕衲衣髻結遊青城不返

天馬

天馬抱竒相緊骨瞳方明出入百萬中有如一鳥輕宇  
宙莽超踏風雲慘經營獨倚雄傑態蕭蕭隨北征朝飲  
南海頭夕秣乃幽并失主坐黯淡別羣奮長鳴豈無輕  
俠兒金羈縣朱纓但感束帛義不忍負死生低頭為君

老嗜啗萬里情

襄陽行

今日何日春氣柔  
東城騎馬花綢繆  
為君停馬一呼酒  
花前倒披紫綺裘  
玉脂汎濫魚鳥飫  
歌舞倦矣蛾眉愁  
千金萬壽好賓主  
今我不樂歲如流  
豈比世上狂馳子  
一語不合行掉頭  
嗚呼天倫古所定  
非有大故寧相尤  
重到錢塘

五首

生死雙飛正可憐  
若為白髮上征船  
未應分手江南去

更有春光七十年

無賴山光疊疊青玉魚金盃早飄零冷思禹穴真奇事  
千古衣冠託杳冥

萬家歌舞送浮生曾有涓埃答太平猿鶴沙蟲天始定  
不須辛苦怨南征

聞道深春雪打圍誰憐身上藕絲衣莫憂白壁成塵土  
解逐南風萬里歸

惟有寒潮不世情朝朝莫莫過空城百年車馬閭門外

獨獨春風草又生

崔

璆

字子玉京口人

璆美風儀善談論晚病狂攜大瓢貯酒行市拍掌歌笑未死十日自表石曰醉鄉伯崔璆之墓

攜錢鉞汎江

酒星落江口化為崔子玉孤舟載壺觴水花紅映肉小兒唱銅斗大兒倒醺醺一笑不知年浩蕩天地屋慎勿臨竇呼人生隨轉燭嗣宗禮法仇鍾會被殺戮

咄咄

咄咄復咄咄小兒成老翁么微各形色追琢元化工不  
知春風去又見千綠叢主人美容懷載酒行溪東一步  
一回首十步尊已空靈均與太白醒醉同所終願見化  
蟣蠓生死託壺中

今日一何好

今日一何好花下醉狼籍醉中有奇事夢見生八翼浩  
蕩排虛空靈君好顏色朱衣持大篆授我醉鄉伯頓首  
玉墀下臣瑯才蟣蝨封此抑何功請陳愚頑臆臣家京

口東門前大江碧臣願駕長風吹作酒萬石萬象各千  
鍾拍拍大庭國推枕在山中紙衾霜曉月

魚

潛

字德昭姑孰人

潛救重和易推分澹泊不忤於物所居環堵埽地  
焚香彈琴讀書養鷺鴨百頭以給食終八十餘

古意

二首

青青陵上柏落落勁不催人生百年內朝夕變所懷斗  
酒命同好萬里不顧回聞有昌國君談笑黃金臺柔言  
更長跪信是富貴媒但恐氣習移古今不同才寄言去

國者歲晚有餘哀

權衡豈公平天駟但伏櫪東井不救湯倉庫何時實元  
工肯假借名器其可惜如何萬萬古不行督責術

楊白花

楊白花誰教度簾幙搖蕩春風能幾何不比無情自漂  
泊人生祇合作支離長秋鷗啼江水落

送鄭祕書南歸

垂老乃如此憑高俱惘然空能正幾字好去作千年童



子歌鵲鵲幽人拜杜鵑江花獨爛熳春去得誰憐

聽歌

行雲流水出名姝酒盡花前雙玉壺此曲江南都忘却  
春風轉調小單于

柯芝

字士先瑞陽人

芝早通五經善詞賦又詣行在所見章祕書求讀  
書省中益通諸家教授生徒著書百餘卷子茂謙

耳耳

耳耳非佳語陸陸難為顏我生胡不淑多戚長鮮歡搖

落復已綠春風滿江干曜靈起予興欲言骨肉酸園桑  
摧為薪桃李亦半殘翹堯企晴燠九室十更寒飛錢如  
美色乃入貴者闌丘閭有穀賣窮欄朝無饘不售信成  
隱徒手良抱歎宛轉愒餘息溝壑分寸間吾輩正不免  
遑暇卹彼瘝

餘髮

餘髮蕭蕭白垂領十年一拙門庭冷來頻沙鳥頗相識  
起晚鄰雞已三請形骸挂樹豈復好心緒如蓬不能整

平生幾緬空馭駢老去一盃先醕酌俗言祇虞方鑿迂  
人事但愜幽居屏聖賢未必盡芻狗天地何堪共鼃黽  
若為苴履曾足芥幸不柳衫真欲癭一聲樵響何處來  
獨立看雲發深省

橫江

橫江一片碧攜鶴上漁船收綸不成下却抱釣竿眠

柯茂謙

字退子

魯港

十年回首付霑襟  
斷甲沈沙齒齒深  
可惜使船如使馬  
不聞聲鼓但聲金  
人歌鬼哭都堪歎  
木落江空正獨吟  
遺老蕭條漸無語  
酒旗颭颭出蘆林

江行早發

陶鑪煮孤影  
寒燈沸青花  
水開數江樹  
月落失人家

邵定

字中立廬陵人

定溫粹博雅通周易春秋宅邊植梅竹蘭桂蓮菊  
各十餘本深衣大帶婆娑其間自稱六薌老人

山中

白日看雲坐清秋對雨眠眉頭無一事筆下有千年

漁家

漁家臨水住春盡無花開年年謝流水流得好花來

熊與和 字天樂豫章人

與和性介澹無妻不食肉通經史百氏之書布衣草屨遨遊諸名山尤嗜彈琴草書

木平飼龍亭次韻方巨山

眼見何如得耳聞山根磅礴極初分浮漚起滅自潭影  
大地晴陰空嶺雲何處老人來聽講他年少府有移文

由來清調須吾輩幸不山王愧五君

唐玄宗鐵像

魏冠攢疊碧雲花坐閱山中幾歲華莫把金丹輕點化

正愁生死困安家

晏

又字明叟宜春人

又風度秀整主趙崇灃後灃  
逮繫又自請詣獄俱以瘐死

夢中

春樹年年少寒雲浦浦連片帆高浪起斗酒夕陽偏沙

市懷司馬州城哭老邊太平冠蓋盡爾敢望諸賢

訪吳

平生一語不肯吐浩然披髮行西林美人十日跨驢出  
黃葉堆門雲雪深

孫

璉

字器之大庾人

璉家貧益嗜書不應選舉  
躬耕織屨以食終百歲

述懷

二首

少也不諧俗老去益美閒百草生已綠春雨滿南山朝

朝荷鋤去既夕驅牛還生長  
茆簷下貧賤良獨安但願  
桑麻長優游足歲年

坐倦秋樹根攝衣步前丘  
橫河澹如練破月西南流  
獨持一尊酒悠悠發清謳  
俯仰無不足吾生焉所求

楊應登

字幼平臨江人

應登寬厚長者有德行言辭七試國  
子不第退就耕牧老于南塘孫雯

寄趙梅州

江城雁叫天如水寒色蒼蒼草木死  
哀歌未斷月東出



有才無命可流涕今我不樂思梅州束帶深衣百僚底  
天下規矩見卓絕龍章麟角諸公子白頭時節得蠻府  
歸來閉門呼不起惆悵平生狗馬病風后力牧長已矣  
為公問酒日日酤薰門富貴憂患始

水宿

水宿逢今雨春歸及故園聖朝臣已老往事客何言乞  
朱分鄰里看書到子孫蒼茫不可會一笑了清樽

楊震

字天章

迢迢空同山

迢迢空同山乃在西極巔玉泉蔭靈芝上有千歲仙安  
得凌風翼相從白雲間神仙本冥漠天運仍推遷不如  
酌我酒或得成自然田父要我語飲者亦非賢願君長  
獨醒加餐足高年

宋武帝廟

溪聲答松風巨石出老拳古樹不知名岌岌蛟龍纏夕  
陰互出沒秋華帶芳鮮蔥蔥帝王氣基宇垂千年虎賁

秉霜戟慘澹生雲烟宮人翠龍駕手持玉連蜺昌明坐  
恍惚精神雷在天大呼司雍間旬月無秦燕昔為萬夫  
特今受衆目憐石馬亦埋沒歲時草芊芊小臣異代士  
見之淚迸泉齊人思爽鳩蜀人哀杜鵑江東舊正朔禮  
奉敢不虔但願君王心不忘載荻船下山又再拜白日  
當空縣

宿峽市

人烟正搖落樓笛頗清圓老樹依山驛東風上峽船江

湖萬里外燈火十年前世路能令老吾生且醉眠

早春

不知何處碧雲鄉冉冉平生可斷腸  
怪底乾坤惟理在老來歲月更心長  
城頭急鼓千家夢江上殘梅一水香  
自作醉侯開醉國笑人奔走為誰狂

客

北客相催發一日舉千帆  
遥憐庾開府歲晚望江南

番陽布衣

以下無名氏五人

有書中山驛云回首  
萬里歲晚何言云云

番陽布衣題

回頭四十五年非無賴秋光滿客衣可惜吳中蓴菜好  
陸機張翰不同歸

瀟湘漁父

崔瑋晚泊湘江淡烟微月有客歌而過  
之追問居與名置其釣竿長嘯而去

高枕形骸外空江何限情落葉不成調半夜起秋聲

古碑文

揭大中云或漁于潭得片石字十數行率磨沒僅識得二十八字意幽人憤士之作不合於時故沈之以俟知者

乾淳老人氣岳岳破冠穿履行帶索撐腸挂肚書萬卷  
臨風欲言牙齒落

閩清野人

僧惠了行閩清谷中三日到一空舍稍憩有一人荷鋤來便向熟睡僧既尋路還他日再往已焚其舍惟斫樹白而書云


偶與雲水會不與雲水同雲散水流去杳然天地空

羅浮狂客

趙孟柔云柔錄事惠州聞羅浮道士言咸淳中客  
有戴烏帽著靴往來山中見人輒大笑反走三年  
不言姓名他日醉歸忽取煤  
書壁上云云長揖渡海去

雲意不知滄海春光欲上翠微人間欲墮千劫猶探梅  
花未歸

右俱宋末高人詩採清江杜本原編合為一卷



宋元詩會卷五十六